

Silva Semadeni fa squitsch politic

Interpellaziun per l'instrucziun academica rumantscha

DA CLAUDIA CADRUVI / ANR

■ L'emprim ha la cussegliera naziunala Silva Semadeni, pss, fatg ina dumonda simpla per tutgant la professura per litteratura rumantscha vacanta. Uss augmenta ella dentant la furma d'intervenziun ed inoltescha en quests dis ina interpellaziun. Tut ils cussegliers naziunals grischuns han sutscrit l'intervenziun ma era auters sustegnan Semadeni. Enfin ier avevan pli che 30 differents parlamentararis sutscrit l'interpellaziun.

«Igl è la clera voluntad e la clera obligaziun dal cussegl federal da promover il rumantsch inclus la scolaziun academica e perscrutaziun.» Quai ha il cussegl federal respundi a la dumonda che Semadeni aveva inoltrà ils 18 da mars 1998. E gist cun questa construcziun ha Semadeni cumenzà sia interpellaziun. Ella fa attent che la situaziun saja vegnida mendra dapi la resposta. La professura per litteratura rumantscha a la SPF ed universitad da Turitg è vacanta dapi il 1997. Enfin la stad 1998 hajan ins mantegnì l'instrucziun cun incumbensas d'instrucziun. L'enviern 1998/99 n'hajan gi lieu naginas prelecziuns. Dapi 1997 hajan perquai nagins students cumenzà a studegiar il rom da la litteratura rumantscha a Turitg.

Sminar nagut dal bun

Ins na sminia nagut dal bun, scriva Semadeni. Oravant tut sch'ins enonuschia la decisiun da la direcziun da la SPF da l'avust 1998 da scursanir ils cre-



Cussegliera naziunala Silva Semadeni inoltescha ina interpellaziun davart l'instrucziun academica rumantscha. LO

dits annuals per las plazzas tar las ciencias umanas. Ed il malesser da Semadeni en quest connex daventa anc pli grond damai che la scolaziun academica rumantscha n'appartegna tuttavia betg tar las incumbensas primaras da la SPF.

Da l'optica da la SPF saja quest svilup chapibel. Ma per la lingua rumantscha saja il svilup insupportabel e dovria uss urgentamain in scleriment.

Gist oz ch'i basegnia dapli scolasts cun scolaziun academica per la maturitad bilingua u era spezialists per las medias rumantschas, manchia l'instrucziun necessaria a l'universitad.

Betg sin donn e cust dal talian

La cussegliera naziunala fa perquai trais dumondas: «È il cussegl naziunal era da l'opiniun che la professura rumantscha per lingua e litteratura sto vegnir occu-

pada immediat e garantida per il futur – independentamain da l'evaluaziun en il departament da las ciencias umanas a la SPF?» Semadeni fa era attent che quai na duaja betg succeder sin donn e cust d'autras linguas minoritaras sco per exempel il talian.

Plinavant vul ella savair sch'il cussegl federal è pront da fixar a scrit la professura entaifer ses mandat da prestaziun per maun dal cussegl da la SPF. Sche quai na saja betg il cas, alura vul la cussegliera savair, tgenina schliaziun alternativa e da medema valur ch'il cussegl federal prevesia.

Il davos menziunescha Semadeni il cas che l'occupaziun da la professura rumantscha vegniss retardada vinavant e dumonda per quest scenari: «Parta il cussegl federal l'opiniun che ... l'instrucziun cun scolasts qualifitgads, q.v.d. habilitads, duaja vegnir prendida si immediat?»